

Societati mercatorum in Indiam commeantium dono dedit. Scriptura Devanagarica. Continet carminis textum et MALLINÁTHÆ commentarium. Initio capitis octavi desiderantur viginti disticha, quorum loco per errorem insertum est initium capitis duodecimi.

F. Catal. No. 536. E libris COLEBROOKII. Forma maxima, charta Europæa, scriptura Bengalica. 312 foliis continet carmen integrum cum commentariis MALLINÁTHÆ, VRIHASPATIMISRÆ et BHARATASENÆ. Sed MALLINÁTHÆ commentarius descriptus est e codice E. ideoque in textu meo constituendo nil novi adjumenti ex hoc codice haurire potui.

G. Quondam e libris JOHANNIS TAYLOR, atque in ejus catalogo numero 146 notatus. Scriptura Devanagarica. Continet textum et MALLINÁTHÆ commentarium, inde ab initio usque ad distichon quadagesimum capitis XVII.

H. Ex eadem collectione, No. 145. Scriptura Devanagarica, 126 foliis continet carminis textum, hic illic a formicis laceratum.

I. E libris GAIKOWAR. Catal. No. 1837. Scriptura Devanagarica, 215 foliis continet integrum MALLINÁTHÆ commentarium. *Samvat* 1778, *Sáka* 1643, (A. C. 1721 seu 1722).

K. Catal. No. 1268. E libris COLEBROOKII. Scriptura Bengalica, charta rubida, 302 foliis continet VRIHASPATIMISRÆ commentarium.

W. Codex V. Cl. CAROLI WILKINS, quem, quod semper gratissimo animo recordabor, senex venerabilis inspiciendum et cum textu meo comparandum liberalissime mihi permisit. 138 foliis integrum tenet carminis textum, litteris Devanagaricis nitidissime et, quod in hujusmodi libris perraro locum habet, accurate simul scriptum. Pauci errores, qui occurrunt, indicare mihi videntur, hunc codicem descriptum esse e codice Bengalico.